

EDIKỌŃ JESUS KE ETO

Matthew 27:27-56

QYQHỌ UKPEP-ŃKPỌ 64

Eke Mkpawara

IKỌ IBUOT: “Abasi otim ayarade ima eke amade nnyin, ke emi Christ akpade ke ibuot nnyin ke adañemi nnyin isuk idide mme idiọk owo kaña” (Nwede Mbon Rome 5:8).

Udim Isañ Ndika Calvary

Ema ebiere ikpe mkpa ke krọs enọ Jesus, ata idiọk ye mkpa esuene emi mme asua Esie ekekerede ete odot. Enye ikanamke baba ńkpọ kiet eke odotde mkpa, edi sia mme Jew ekefubede Enye ufup, mmọ ekenam emi man esio Enye ke otu mmọ efep.

Akanam ererimbot ikwe utọ udim isañ emi ekesañade eka Obot Calvary. Eyen Abasi, emi mme owo ekesuenede, ama asaña ye mmọ “obiom krọs Esiemọ.” Otu oro ema etiene Jesus, kpa mme asua Esie, esak Enye nsahi, enyuñ emia Enye. Mmọ efen, akpan-akpan iban, ema esaña ńko ye Enye enyuñ etuaña. Mmọ eketua ke abaña esuene emi ekesuenede Ọbọń; Jesus ke ini okutde mmọ, ọdọhọ mmọ ete ekutua ebaña Imọ, edi yak ekam ekere ebaña ufen eke anade nte etiene Nditọ Israel ke ntak akwa idiọk-ńkpọ oro.

Jesus ama okop mmemidem oto ke ntak ọkpọsọń ufen, ndien Enye ama ọduọ ke idak udobi krọs oro. Edieke afo okpokodude do nte afo ukpokoyomke ndiñwam Jesus ndibiom krọs Esie? Baba owo kiet ikoduhe ndinọ Enye uñwam, do ke ekemum Simon, owo idut efen emi okoyomde ndisaña mbe, ete obioma krọs ọdọk ke obot oro. Nnyin ikpakam ibiom krọs Esie ke ọyọhọ inemesit!

Ke ini otu owo esimde enyọń obot, ema eneñere Jesus edian ke krọs enyuñ eda okpukwak ekọń Enye ubọk ye ukot edian do; ndien emenere krọs ewuk man kpukpru owo ekut nte ekesuenede Christ. Ema enyuñ ekọń inọ iba edian do, man ekem ye ikọ Abasi, “Mmọ enim udi esie ye mme idiọk owo, edi enye odu ye owo inyene ke mkpa esie” (Isaiah 53:9).

Ikọ Abasi Ama Osu

Edi se idemerede spirit ndikut nte Christ otimde anam man ekekem ye mme ntiñ-nnim ikọ eke ebañade Enye. Nnyin imọń isiak ndusuk mi. Kiet ke otu mbet akatap Enye: “Kpa owo emi edide ufan mi, emi mbuọtde idem mi ye enye, emi adiade udia mi, ememen ukot atigha mi” (Psalm 41:9). Eketap Enye ke mbak sidibe (silver) edip ye duop, ema eda okuk emi ekeyak, ndien eda isọń man ebuk mme ubuene: “Ndien mmọ edomo shekel silver edip ye duop enọ ke utip mi ... Ndien mmen silver edip ye duop oro nduọk ke ufọk Jehovah nnọ obot-eso” (Zechariah 11:12, 13). Ema emia Jesus ke ikpa enyuñ esuñi Enye: “Nkeyak idem mi nnọ mmọ eke eyibide, nyak mfuk mi nnọ mmọ eke ediberede idet: ndipke iso mi mfehe but ye etap” (Isaiah 50:6). Enye ikọbọrọke mmọ emi ekedoride Enye ikọ, inyuñ idomoke ndifaña Idemesie: “Eda Enye nte eyen-erọń eka, ete ekewot, ndien kpa nte uman erọń odopde inua ke iso mme andifat enye, kpa ntre enye inyuñ itatke inua esiemọ” (Isaiah 53:7). Ekọń Enye ubọk ye ukot ke okpukwak: “Ekim mi ubọk ye ukot” (Psalm 22:16). Mme Jew, kpa oruk Esie ema ekọń Enye: “Ndien owo eyebup enye, ete, nsidi mme unan emi ke ubọk fo? Ndien enye eyebọrọ ete, Edi se ńkadade ke ufọk mme ufan mi” (Zechariah 13:6). Kpa ye vinegar ekenode Enye ọńwọń ke ini ọkọńode ke krọs, edi se ema eketiñ ebaña: “Ndien mmọ enọ etidot ke udia mi; enyuñ enọ mi vinegar ńńwọń ke nsat itọń mi” (Psalm 69:21). Mme utọ ntiñ-nnim ikọ ntem edu; ndien edieke mme ewet-ńwede (scribe) ye mme Pharisee ekpekeyomde ndinim Jesus ke akpanikọ, mmọ ekpekediọń ete Enye ekedi Messiah, koro Enye ama etiń ete, “Mbufo eduńore Nwede Abasi, ... ndien edi enye edi ntiense ọnọ mi” (John 5:39).

Enyeñe Mme Utom Obot

Ekekọń Jesus ke ńkanika usukkiet usen-ubọk, ndien ke uwemeyo, ekim ama ofuk isọń. “Ọtọńode ke ufọt uwemeyo tutu osim hour ita ke uwemeyo, ekim ama ofuk ofuri isọń. Mmọ emi ekesañade do ebe, enyuñ ekutde nte ewetde ke krọs, “EMI EDI JESUS EDIDEM MME JEW,” ema esak enyuñ esuñi Enye ye mme ikọ emi, “Enye akanyaña owo efen: ikemeke ndinyaña Idem Esie,” Jesus ama enyene odudu ndikpanyaña Idemesie, edi Enye ikpakanamke utom erifak owo ọyọhọ edieke Enye ọkpọkọsuhọrede ke krọs. Jesus ekedi Eyen Abasi, ke ntak oro, Enye ama ọkọńọ ke krọs man ekpe ekọm-urua ndifak nnyin nnọ Abasi. Enye ikpọń ekekeme ndikpe ekọm-urua oro.

Ke ńkanika ita uwemeyo, ke ini uwa mbubreyo, unyek-isọń ama odu, mme ikpọ itiat enyuñ esiaha, ofuri isọń ama otimere ke adañaemi Andibot enye ọkọkọńode ke ufọt heaven ye isọń, onyuñ okutde mkpa esuene ke ubọk mme idiọk owo. Adaña oro ndien mme owo ema etọńọ ndifiọk ete ke Jesus ama okpon akan ikpikpu owo, edi ini ama ebe nte mmọ ekpekekọńode Enye ke krọs. Enye ama ọduọk akpatre ibifik Esie. Ke akpatre hour oro, Enye ama ọbọ ndutuhọ eke okokponde akan.

Ete ama ọwọńore iso Esie koro Enye ikekemeke ndise idiọk-ńkpọ ofuri ererimbot emi Eyen Esie okobiomde. Jesus ama ofiori ete: “Abasi Mi, Abasi Mi, nsinam Afo ọkpọńde Mi?”

Ikpehe Itie-ukpono Abasi Asiaha

Ke ndo-ndo oro Christ ayakde ukpōn Esie, ikpehe Itie-ukpono Abasi asiaha ọtōnōde ke enyōn tutu osim ke isōn. Nte ekedōkde mben ikpehe oro ama odoobi inch kiet ndien ikpedighe mmem-mmem nkpō ndisiak enye, ibōhōke, ke akwa ubōk Abasi. Ikpehe emi ọkọkōnō ke usuñ emi esañade eduk Ata Edisana Ebiet, esit ubet emi Akwa Oku ikpōn-ikpōn ekenyenede ndiduk, enye ikpōn ini kiet ke isua, ke usen Usio-isop. Enye ekenyene ndisaña ye iyip eyen-erōn emi ewade ke abaña idiok-nkpō mme owo. Ke ini ikpehe Itie-ukpono Abasi akasiahade, usuñ ama ana iñwañ ọnọ kpukpru owo ndibe nduk ke Ata Edisana Ebiet ke idem mmọ ndinam mkpe-ubōk nnọ Abasi, idighe aba oku ndibōn akam ke ibuot mmọ. Christ ke ini Enye ama akakpa, akabare edi Akwa Oku nnyin, ada Iyip Esie osio isop mme idiok-nkpō nnyin ke iso Abasi. Ke ini nnyin ibōnde akam inọ Ete, nnyin ibōn ke enyiñ Jesus, inyuñ ibeñe ite ada Iyip oro ọkọduhōde eyet esit nnyin. Ke edinam ntem ke nnyin inyene erifak, erinyaña nsio ke idiok-nkpō nnyin, oto ke Iyip Jesus.

MME MBUME

1. Ke mmōn ke ekekōn Jesus? Ye mme anie?
2. Anie okobiom krōs ọdōk ke obot?
3. Nso nkpō ikotibe ọtōnōde ke ufot uwemeyo tutu osim nkanika ita?
4. Ke nso utọ ini ke Jesus akakpa, nso nkpō efen ikotibe ke ukem ini oro?
5. Ke nso utọ usuñ ke nnyin inyene ndibōn akam nnọ Abasi mbeñe erinyaña ukpōn?